

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI KHAMIS : 21 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan apakah syarat atau kriteria yang perlu dipatuhi sebelum kelas Program Pendidikan Khas Integrasi (PPKI) dibuka di sesebuah sekolah, dan apakah Kementerian mempunyai tenaga pengajar yang cukup untuk membuka lebih banyak kelas PPKI di sekolah harian.

JAWAPAN

Tuan Yang di-Pertua,

Dasar Pendidikan Khas Kementerian Pendidikan Malaysia (KPM) adalah untuk memberikan peluang kepada murid berkeperluan khas (MBK) mendapat akses pendidikan yang sesuai dan relevan dengan kebolehan masing-masing. Hal ini penting supaya semua MBK dapat berdikari dan menjalani hidup yang berkualiti. Pendidikan bagi MBK dilaksanakan di Sekolah Pendidikan Khas, Program Pendidikan Khas Integrasi (PPKI) dan Program Pendidikan Inklusif (PPI).

KPM memberi fokus kepada pendidikan inklusif iaitu MBK untuk belajar bersama-sama murid arus perdana dalam satu kelas yang sama selaras dengan penekanan kepada aspek kasih sayang (*love*), kegembiraan (*happiness*) dan saling menghormati (*mutual respect*).

Merujuk kepada Buku Panduan Pengoperasian Pendidikan Khas Integrasi (PPKI), bagi prosedur pembukaan kelas PPKI, setiap sekolah perlu mengambil kira beberapa aspek bagi memastikan kelas PPKI yang dibuka dalam keadaan terurus dan bersedia untuk melaksanakan program.

Syarat dan kriteria pembukaan kelas PPKI

Untuk makluman Ahli Yang Berhormat, sekiranya terdapat sekolah yang berhasrat untuk membuka kelas PPKI, perkara-perkara berikut perlu diambil kira iaitu permohonan ibu bapa/penjaga, unjuran murid dan keperluan Guru Pendidikan Khas Integrasi (GPKI), infrastruktur fizikal bilik darjah, peralatan dan bahan pengajaran. Sekolah harian yang berhasrat untuk melaksanakan program ini, perlu mengemukakan permohonan ke Jabatan Pendidikan Negeri (JPN) di negeri masing-masing dalam tempoh dua tahun sebelum pelaksanaan program bagi membolehkan JPN membuat unjuran perjawatan dan sebagainya. Selain daripada itu, aspek keselamatan kelas, kesesuaian lokasi, dan keluasan minimum bagi sesuatu kelas PPKI juga perlu diberi penekanan untuk pembukaan kelas PPKI.

NO. SOALAN : 1

Bagi memastikan kriteria dan syarat ini dipatuhi, pihak JPN perlu menjalankan proses naik taraf atau pengubahsuaian bilik darjah sedia ada. Kelas Pendidikan Khas dicadangkan dibuka di lokasi yang strategik dan perlu berada di aras bawah bangunan sekolah serta mempunyai kemudahan mesra orang kelainan upaya (OKU). Ini bertujuan memudahkan pergerakan murid pendidikan khas.

Sekiranya berlaku keadaan yang memerlukan pembukaan kelas PPKI dibuka pada tahun semasa, pihak sekolah perlu memastikan terdapat guru dan bilik darjah yang mencukupi untuk MBK di sekolah berkenaan.

Bilangan dan keperluan guru

Sehingga 30 Jun 2019, bilangan guru yang mengajar di PPKI adalah seperti berikut:

1. seramai 183 orang di peringkat prasekolah;
2. seramai 8,217 orang di sekolah rendah; dan
3. seramai 5,846 orang di sekolah menengah.

Walau bagaimanapun, sekiranya terdapat keperluan segera untuk mengatasi isu kekurangan guru di PPKI maka KPM akan melaksanakan pengambilan guru interim pendidikan khas.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
(PASIR MAS)**

TARIKH : 21 NOVEMBER 2019 (KHAMIS)

SOALAN

Minta **MENTERI PERTAHANAN** menyatakan apakah Kerajaan bersedia untuk menerima tawaran kerajaan Rusia untuk mengambil balik 28 jet pejuang jenis Sukhoi Su-30MKM dan MIG-29 milik Tentera Udara Diraja Malaysia (TUDM) yang bermasalah jika Malaysia sedia menggantikannya dengan pesawat baharu buatan negara itu.

JAWAPAN

Tuan Yang di-Pertua,

Pada masa ini, Kementerian Pertahanan lebih menumpukan kepada aset pertahanan bercirikan kawalan dan rondaan sempadan maritim bagi menghalang pencerobohan asing. Sehubungan dengan itu, Tentera Udara Diraja Malaysia (TUDM) telah menyediakan Pelan Pembangunan Keupayaan TUDM 2055 atau CAP55 yang menggariskan perancangan menyeluruh pembangunan keupayaan TUDM sehingga tahun 2055. Pelan ini merangkumi perolehan aset baru selari dengan peredaran masa, penggantian pesawat yang usang dan naik taraf aset sedia ada dengan mengambil kira faktor perancangan yang realistik berdasarkan keutamaan masa yang berfokuskan kepada pengurangan jenis pesawat, menangani isu keusangan dan peningkatan kos senggaraan.

Justeru dengan itu, TUDM akan terus mengekalkan pesawat pejuang F/A-18D Hornet dan Su-30MKM untuk tempoh RMK 12 dan RMK 13. Keperluan terkini adalah perolehan *Maritime Patrol Aircraft* (MPA) dan *Medium Altitude Long Endurance Unmanned Aerial Vehicle* (MALE UAV) serta keupayaan tempur ringan dan latihan juruterbang melalui perolehan *Light Combat Aircraft* (LCA) bagi menambah baik keupayaan dan kesiapsiagaan TUDM.

Walaupun pembelian jet pejuang baharu tiada dalam perancangan TUDM, Kementerian Pertahanan masih meneliti tawaran daripada Kerajaan Rusia dengan meneliti segala aspek termasuk aspek ekonomi dan kewangan negara.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 21 NOVEMBER 2019

SOALAN

**Puan Hajah Natrah binti Ismail [Sekijang] minta MENTERI
PEMBANGUNAN WANITA, KELUARGA DAN MASYARAKAT**
menyatakan statistik mangsa keganasan rumah tangga di seluruh
negara.

JAWAPAN

Tuan Yang di-Pertua,

Bagi menangani isu keganasan rumah tangga, Kementerian Pembangunan Wanita, Keluarga dan Masyarakat (KPWKM) mengambil tindakan di bawah Akta Keganasan Rumah Tangga 1994 [Akta 521]. Menerusi akta ini, Kerajaan memperuntukkan perlindungan undang-undang dalam situasi keganasan rumah tangga dan perkara-perkara yang bersampingan dengannya. Tindakan segera akan dijalankan bersama agensi-agensi penguatkuasaan seperti Polis Diraja Malaysia (PDRM), mahkamah dan agensi yang berkaitan bagi memastikan segala bentuk keganasan rumah tangga dapat dibendung.

Bagi tahun ini sehingga Jun 2019, sebanyak 340 kes telah dilaporkan ke Jabatan Kebajikan Masyarakat (JKM). Daripada jumlah tersebut **316** mangsa adalah perempuan dan **24** kes adalah lelaki. Tiga (3) negeri yang mencatatkan kes keganasan rumah tangga yang tertinggi ialah Selangor sebanyak 91 kes (27%), diikuti Pahang 56 kes (16%) dan Kedah 34 kes (10%).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TAN SRI NOH BIN HAJI OMAR
[TANJONG KARANG]**

TARIKH : 21 NOVEMBER 2019 (KHAMIS)

SOALAN NO. 4

Minta **MENTERI PERTANIAN DAN INDUSTRI ASAS TANI** menyatakan apakah implikasi terhadap penggunaan bubu naga yang mampu menggugat pendapatan nelayan pesisiran pantai.

JAWAPAN

Yang di-Pertua,

1. Peralatan bubu naga yang juga dikenali sebagai bubu kamban telah digunakan sejak tahun 2005 oleh nelayan darat untuk menangkap udang galah dan ikan ketutu di sungai dan tasik. Bubu ini kemudiannya digunakan secara meluas oleh nelayan laut di Perak, Johor, Perlis, Selangor, Pulau Pinang dan Kelantan kerana mudah digunakan dan hanya perlu diletakkan di laut untuk mengutip hasil tangkapan. Berdasarkan kepada syarat lesen Jabatan Perikanan Malaysia (DOF), peralatan bubu tidak boleh mempunyai lebih daripada dua injap, namun begitu, bubu naga telah diubahsuai sehingga mempunyai puluhan injap dan dipasang secara berangkai.

2. Penggunaan bubu naga memberi implikasi yang negatif kepada kemerosotan sumber kerana ianya bersifat destruktif. Bubu ini berupaya menjerat semua jenis spesis dan saiz ikan serta memberi kesan kepada kitaran pembiakan ikan di pesisir pantai. Selain itu, peralatan bubu naga juga menimbulkan konflik dan pergaduhan di kalangan nelayan terutamanya yang menggunakan pukat hanyut. Ini kerana sifat bubu naga yang berangkai dan panjang boleh mengganggu pelayaran dan menyebabkan pukat hanyut tersangkut dan koyak.

3. Kementerian melalui DOF telah mengharamkan penggunaan bubu naga berkuatkuasa pada 1 November 2018. Pada tahun 2019, sebanyak 4,261 bubu naga berjaya dirampas dan disiasat di bawah Seksyen 11(3)(a) Akta Perikanan 1985 dengan nilai rampasan dianggarkan sebanyak RM182,460. Di samping itu, DOF dengan kerjasama Agensi Penguatkuasaan Maritim Malaysia dan Pasukan Polis Marin juga akan terus mempergiatkan usaha pemantauan dan penguatkuasaan larangan penggunaan bubu naga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan serta melihat semula kedudukan pensyarah IPG yang akan ditutup. Apakah perancangan Kementerian terhadap perkara ini.

JAWAPAN

Tuan Yang di-Pertua,

Untuk makluman Ahli Yang Berhormat, setakat ini tiada penutupan Institut Pendidikan Guru (IPG) dibuat oleh Kementerian selaras dengan Kenyataan Media yang dikeluarkan oleh Kementerian Pendidikan Malaysia pada 10 September 2019 yang bertajuk '21 IPG Tutup Tahun Hadapan Tak Benar'.

Pada masa kini Kementerian sedang melaksanakan penyusunan semula pensyarah berdasarkan bidang kepakaran dan keperluan di setiap kampus. Pergerakan pensyarah sedia ada adalah bagi membolehkan Pengajaran dan Pembelajaran di kampus IPG yang menawarkan kursus berkaitan boleh dilaksanakan dengan berkesan. Selain itu, penyusunan ini juga adalah selari dengan amanah tugas pensyarah agar pensyarah boleh memberikan perkhidmatan yang lebih optima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 21 NOVEMBER 2019 (KHAMIS)

SOALAN NO. 6

Minta **MENTERI PERTANIAN DAN INDUSTRI ASAS TANI** menyatakan jumlah nelayan-nelayan yang telah mengemukakan permohonan elaun sara hidup dan jumlah yang telah diluluskan di kawasan Parlimen Pengerang serta apakah kriteria diambil kira dalam proses pemutihan Kerajaan memandangkan ramai nelayan-nelayan gagal mendapat bantuan ini yang sangat bermakna bagi menampung perbelanjaan harian mereka.

JAWAPAN

Yang di-Pertua,

1. Dalam usaha membantu menampung kenaikan kos sara hidup dan pendapatan nelayan yang tidak menentu, Kerajaan melalui Kementerian Pertanian dan Industri Asas Tani telah memperuntukkan bantuan kepada nelayan melalui elaun sara hidup (ESH). Mulai tahun 2020, kadar bantuan ini telah dinaikkan kepada RM250 daripada RM200 sebulan pada tahun 2019 dan dijangka akan memanfaatkan seramai 37,000 pemilik vesel zon A dan awak-awak tempatan.

2. Merujuk kepada rekod Lembaga Kemajuan Ikan Malaysia (LKIM), jumlah penerima ESH sedia ada di Parlimen Pengerang adalah seramai 309 orang. Daripada jumlah tersebut, 25 permohonan baru telah diterima dan diluluskan di Parlimen Pengerang bagi tempoh Januari hingga Ogos 2019.

3. Kementerian melalui LKIM telah menetapkan beberapa kriteria bagi proses pemutihan ESH dalam memastikan bantuan yang disediakan dapat diberikan kepada mereka yang benar-benar layak. Antara semakan kriteria tersebut adalah:

- Status keaktifan turun ke laut terutamanya bagi nelayan yang berumur 70 tahun ke atas dan nelayan wanita.
- Rekod pengisytiharan hasil tangkapan ikan bulanan.
- Rekod transaksi pembelian minyak diesel atau petrol bersubsidi.

4. Namun begitu, nelayan yang tidak lagi menerima bantuan ESH masih boleh mengemukakan rayuan untuk semakan semula dan dipertimbangkan berdasarkan kepada syarat kelayakan ESH yang ditetapkan.

Sekian, terima kasih.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

TARIKH : 21 NOVEMBER 2019 (KHAMIS)

SOALAN

Datuk Wira Hajah Mas Ermieyati Binti Samsudin [Masjid Tanah] minta **MENTERI PEMBANGUNAN WANITA, KELUARGA DAN MASYARAKAT** menyatakan setakat mana kewujudan *Psychological Care Centre* (PCC) dalam memudahkan masyarakat setempat mendapatkan khidmat kaunseling secara percuma.

JAWAPAN

Tuan Yang di-Pertua,

Psychological Care Centre (PCC) merupakan sebuah pusat psikologikal setempat yang menyediakan perkhidmatan psikologi dan kaunseling kepada masyarakat dan komuniti. Tujuan utama perkhidmatan ini adalah untuk memperluaskan lagi perkhidmatan psikologi dan kaunseling kepada komuniti setempat bagi melahirkan masyarakat yang sejahtera dari aspek psikologikal.

Penubuhan PCC adalah tertumpu di kawasan kepadatan kependudukan yang tinggi, kawasan perumahan kos rendah dan kawasan tumpuan orang ramai bagi mendekatkan kemudahan ini kepada masyarakat dan komuniti melalui perkhidmatan yang percuma.

PCC menyediakan Kaunselor / Pegawai Psikologi dari Jabatan Kebajikan Masyarakat bagi menyampaikan perkhidmatan psikologi dan kaunseling kepada komuniti seperti berikut:

- i) Intervensi kaunseling;
- ii) Ujian psikologi;
- iii) Kelompok sokongan;
- iv) Program dan aktiviti psikopendidikan; dan
- v) Program dan aktiviti psikoterapi.

Bagi tahun 2018, seramai 963 orang telah mendapatkan perkhidmatan di PCC. Bagi tahun 2020, sebanyak empat buah PCC dicadangkan untuk ditubuhkan di Negeri Sarawak, Pulau Pinang, Negeri Sembilan dan Melaka.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HALIMAH BINTI MOHAMED
SADIQUE (KOTA TINGGI)**

TARIKH BAHAS : 21 NOVEMBER 2019

SOALAN NO. 8

YB DATUK HALIMAH BINTI MOHAMED SADIQUE [KOTA TINGGI] minta **MENTERI PERDAGANGAN ANTARABANGSA DAN INDUSTRI** menyatakan persaingan nuklear, persaingan teknologi yang meliputi pelbagai aspek, persaingan perdagangan dan persaingan pengaruh politik telah berlangsung dengan begitu sengit di antara negara kuasa-kuasa besar khususnya Amerika Syarikat dan China. Adakah Malaysia akan terheret sama dalam persaingan antara kedua-dua kuasa besar ini atau tidak, kerana Malaysia mempunyai hubungan diplomatik dan perdagangan yang cukup erat dengan Amerika Syarikat dan juga China.

JAWAPAN

Tuan Yang DiPertua,

1. Perang perdagangan dan persaingan terbuka geopolitik di antara Amerika Syarikat dan Republik Rakyat China telah memasuki tahun kedua. Sebagaimana yang dibangkitkan oleh Yang Berhormat Kota Tinggi, persaingan antara Amerika Syarikat dan Republik Rakyat China meliputi pelbagai bidang iaitu termasuk persaingan dalam bidang teknologi, perdagangan, pengaruh politik antarabangsa dan aspek keselamatan kedua-dua negara.
2. Persaingan geopolitik ini secara langsung memberi implikasi besar kepada kebanyakan negara yang menjalinkan hubungan diplomatik dan

perdagangan dengan kedua-dua kuasa besar dunia. Ia juga memberi kesan kepada pasaran saham dunia dan mengubah lanskap perdagangan dan pelaburan sedia ada, bukan hanya di Malaysia, malahan tempiasnya dirasai di kebanyakan negara di seluruh dunia.

3. Pada ketika ini, kedua-dua negara masih meneruskan rundingan bagi mencapai kata sepakat dan seterusnya menyelesaikan konflik yang berbangkit. Untuk pengetahuan dewan yang mulia ini, dua minggu lalu terdapat perkembangan yang positif di mana Amerika Syarikat telah bersetuju untuk mengurangkan tarif barangan yang dikenakan kepada Republik Rakyat China sekiranya kedua-dua negara bersetuju memuktamadkan suatu perjanjian.

4. Menurut laporan yang diterbitkan oleh The *Economist Intelligence Unit* (EIU), perang Perdagangan antara Amerika Syarikat dan Republik Rakyat China telah memberi kesan besar kepada kebanyakan negara, memandangkan kebergantungan perdagangan dunia dengan kedua-dua negara ini terutamanya penglibatan besar mereka dalam *global value chain* (dengan izin) atau rantai bekalan global. Walaupun begitu, Malaysia berpotensi mendapat manfaat daripada krisis ini melalui lencongan pelaburan (*investment diversion*) (dengan izin) atau penempatan semula pelaburan (*investment relocation*) (dengan izin) oleh syarikat-syarikat besar dan syarikat-syarikat multinational (MNCs) Amerika Syarikat serta Republik Rakyat China ke Malaysia. Malaysia juga berpotensi menerima manfaat melalui lencongan perdagangan (*trade diversion*) oleh kerana produk RRC telah menghadapi masalah perdagangan dari Amerika Syarikat.

Tuan Yang DiPertua,

5. Walaupun Perang Perdagangan ini masih berterusan, Kementerian Perdagangan Antarabangsa dan Industri (MITI) yakin bahawa Malaysia mempunyai kemampuan untuk terus menarik pelaburan asing bernilai tinggi dan dalam masa yang sama meningkatkan perdagangan negara. Sebagai contoh, bagi bulan Januari hingga Jun 2019 sahaja, nilai pelaburan dari Amerika Syarikat telah mencatatkan pelaburan asing tertinggi di Malaysia melalui 19 projek

pembuatan yang diluluskan berjumlah RM11.7 bilion. Projek ini akan mewujudkan 3,233 peluang pekerjaan di pelbagai peringkat. Projek baharu dari *Advance Energy Industries* yang menghasilkan produk elektrik dan elektronik (E&E) dan projek pembesaran dari *On Semiconductors* and *Plexus Manufacturing* adalah antara pelaburan utama yang diterima dari Amerika Syarikat. Perdagangan dua hala Malaysia dengan AS juga menunjukkan prestasi yang menggalakkan.

6. Amerika Syarikat merupakan rakan dagang **ketiga terbesar** Malaysia pada tahun 2018. Jumlah perdagangan Malaysia dengan Amerika Syarikat pada tahun 2018 meningkat 1.2% kepada RM155.76 bilion berbanding RM153.95 bilion pada tahun 2017. Jumlah eksport ke Amerika Syarikat adalah berjumlah RM90.81 bilion manakala jumlah import bernilai RM64.95 bilion.

7. Jumlah perdagangan dua hala Malaysia dan Amerika Syarikat dari bulan Januari hingga Ogos 2019 terus menunjukkan pertumbuhan yang positif sebanyak 4.9% mencecah RM106.48 bilion berbanding tempoh yang sama tahun 2018. Manakala eksport Malaysia ke Amerika Syarikat pula tumbuh pada kadar 4.3% kepada RM61.77 bilion berikutan peningkatan eksport Malaysia bagi barangan Elektrik dan Elektronik, kayu, perkilangan berasaskan plastik, makanan yang diproses serta hasil getah. Import dari Amerika Syarikat turut meningkat sebanyak 5.6% kepada RM44.71 bilion.

Tuan Yang DiPertua,

8. Republik Rakyat China pula adalah sumber pelaburan asing yang kedua tertinggi di Malaysia dari bulan Januari hingga Jun 2019 dengan nilai pelaburan sebanyak RM4.8 bilion dari 30 projek yang diluluskan dan pelaburan ini akan mewujudkan sebanyak 4,238 peluang pekerjaan dalam pelbagai sektor. Antara pelaburan berteknologi tinggi yang baru diluluskan adalah Projek Pembesaran Syarikat Longi Technology yang terletak di Kuching, Sarawak. Ia melibatkan peningkatan kapasiti syarikat untuk menghasilkan *monocrystalline solar cell* bagi pasaran luar negara.

9. Peningkatan pelaburan ini membuktikan bahawa Malaysia masih merupakan destinasi pilihan bagi pelaburan strategik di rantau ini. Berdasarkan kepada beberapa perbincangan di antara Kementerian dan komuniti perniagaan dari Amerika Syarikat dan Republik Rakyat China, Malaysia adalah antara pilihan utama di rantau ini kerana lokasi negara yang strategik dan kompetitif. Malaysia juga berada dalam rangkaian bekalan dunia dengan persekitaran perniagaan yang mesra pelabur dan disokong oleh dasar kerajaan yang pro-perniagaan. Republik Rakyat China merupakan rakan dagang terbesar Malaysia selama 10 tahun berturut-turut sejak tahun 2009 lagi. Jumlah perdagangan Malaysia dengan Republik Rakyat China pada tahun 2018 mencecah RM313.81 bilion, dengan pecahan eksport dari Malaysia ke Republik Rakyat China sebanyak RM 138.9 bilion manakala jumlah import dari Republik Rakyat China pula adalah sebanyak RM 174.9 bilion.

10. Secara purata perdagangan Malaysia dengan Republik Rakyat China bagi tempoh Januari hingga Ogos 2019 telah menyusut sebanyak 1.2% kepada RM203.73 bilion berbanding tempoh yang sama pada tahun 2018. Eksport Malaysia ke Republik Rakyat China juga turun secara marginal sebanyak 0.1% kepada RM88.96 bilion, berikutan pengurangan eksport barangan elektrik dan elektronik, pengeluaran getah, petroleum mentah serta barangan optik dan saintifik. Walau bagaimanapun, eksport bagi gas asli cecair (LNG), kimia dan bahan kimia, barangan besi dan keluli serta barangan perkilangan logam telah menunjukkan peningkatan. Import dari Republik Rakyat China pula mencatatkan penurunan sebanyak 2% kepada RM114.77 bilion dalam tempoh yang sama.

Tuan Yang DiPertua,

11. Kerajaan sentiasa merangka strategi dan mencari jalan terbaik bagi menggiatkan usaha untuk mengurangkan risiko krisis perdagangan antara Amerika Syarikat dan Republik Rakyat China. Antaranya, usaha khusus telah disasarkan terhadap syarikat-syarikat yang beroperasi di Republik Rakyat China untuk mempromosikan Malaysia sebagai pusat pengeluaran serantau alternatif (*regional production hub*) khususnya bagi pasaran Amerika Syarikat. Pejabat agensi di bawah seliaan MITI

iaitu MATRADE di Amerika Syarikat contohnya, turut mempergiatkan aktiviti promosi galakan terhadap pengimport di Amerika Syarikat yang sebelum ini membeli kebanyakan produk dari Republik Rakyat China supaya dapat mempertimbangkan Malaysia sebagai sasaran alternatif import yang baru.

12. Selaras dengan pembentangan Belanjawan 2020, satu saluran khas akan ditubuhkan di bawah agensi Kementerian ini iaitu InvestKL, bagi menarik pelaburan dari Republik Rakyat China yang mempunyai ciri-ciri '*high tech, high value and high impact*' (dengan izin). Inisiatif ini bertujuan untuk menarik dan membantu mempermudah pelaburan asing langsung dari syarikat-syarikat Republik Rakyat China serta syarikat-syarikat multinasional asing (MNC) yang berpusat di Republik Rakyat China, yang berhasrat untuk mengembangkan atau mempelbagaikan operasi perkilangan ke Malaysia.

Tuan Yang Dipertua,

13. Malaysia akan menganjurkan Persidangan Asia-Pacific Economic Cooperation (APEC) pada tahun 2020 yang akan turut dihadiri oleh Presiden Amerika Syarikat dan Presiden Republik Rakyat China. Malaysia mengharapkan agar Persidangan APEC ini dapat dijadikan platform untuk kedua-dua negara besar ini serta negara-negara seranta lain mencapai kerjasama dan pemuafakatan khususnya dalam bidang ekonomi. Saya mengharapkan agar APEC 2020 dengan tema *Optimising Human Potential Towards A Future Of Shared Prosperity* (dengan izin) akan turut menyumbang kepada kesejahteraan ekonomi serantau, dan secara tidak langsung dapat menyelesaikan konflik perdagangan antara Amerika Syarikat dan Republik Rakyat China.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN AHMAD FAHMI B. MOHAMED FADZIL
(LEMBAH PANTAI)**

TARIKH : 21 NOVEMBER 2019

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI DALAM NEGERI** menyatakan kesediaan Kerajaan untuk memansuhkan Akta Hasutan 1948, serta adakah Kerajaan berniat menggubal sebarang undang-undang bagi menggantikan akta tersebut untuk memastikan keselamatan negara terus terjamin.

JAWAPAN

Tuan Yang di-Pertua,

Selaras dengan janji manifesto, kementerian telah pun menubuhkan Jawatankuasa Khas untuk melaksanakan kajian terhadap undang-undang berkaitan keselamatan termasuklah Akta Hasutan 1948. Jawatankuasa Khas yang dianggotai oleh pihak-pihak yang berkepentingan seperti Jabatan Peguam Negara, Polis Diraja Malaysia, Badan Peguam Malaysia, Suruhanjaya Hak Asasi Manusia Malaysia (SUHAKAM) termasuk badan bukan kerajaan (NGO) ditubuhkan untuk menilai dan memperhalusi setiap peruntukan di dalam undang-undang berkenaan berdasarkan piawaian hak asasi manusia, selain mengenal pasti implikasi-implikasi keselamatan yang akan timbul jika dimansuhkan.

Kementerian juga perlu mengambil kira implikasi pindaan berbangkit kepada perundangan-perundangan lain sekiranya pemansuhan Akta

SOALAN NO : 9

Hasutan ini berlaku kerana terdapat peruntukan-peruntukan mengenai akta ini turut bersangkutan dengan peruntukan dalam Perlembagaan Persekutuan dan 11 perundangan lain yang berkuat kuasa iaitu:

1. Federal Constitution, Criminal Procedure Code;
2. Election Offences Act 1954;
3. Extra-Territorial Offences Act 1976;
4. Local Government Elections Act 1960;
5. Akta Mesin Cetak dan Penerbitan 1984;
6. Public Order (Preservation) Act 1958;
7. Registration of Criminals and Undesirable Persons Act 1969;
8. Akta Pertubuhan 1966;
9. Youth Societies and Youth Development Act 2007;
10. Defamation Act 1957; dan
11. Ministers of Federal Government Order 2019.

Berdasarkan hasil kajian yang dijalankan, kementerian berpandangan bahawa pemansuhan Akta Hasutan 1948 hanya boleh dipertimbangkan setelah seksyen khusus mengenai kesalahan-kesalahan yang melibatkan institusi raja, kaum dan agama tersebut dipindahkan dan dimasukkan ke dalam undang-undang lain yang sedia ada seperti Kanun Keseksaan ataupun diwujudkan undang-undang baharu.

Pada masa ini, kajian lanjut bersama Jabatan Peguam Negara dan agensi-agensi kerajaan yang lain masih sedang dijalankan bagi memastikan perkara-perkara yang berkaitan perlindungan institusi diraja, kaum dan agama dapat dipelihara. Ini bagi memastikan tiada kelompangan undang-undang berlaku dan keselamatan negara terus terjamin sekiranya Akta Hasutan 1948 dimansuhkan. Sebelum Akta Hasutan dimansuhkan, perkenan Majlis Raja-raja perlu diperoleh terlebih dahulu kerana terdapat peruntukan mengenai Raja di bawah Perkara 181 Perlembagaan Persekutuan, Perkara 152, Perkara 153 dan Bahagian III Perlembagaan Persekutuan diperuntukkan dalam seksyen 3 Akta Hasutan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 21 NOVEMBER 2019 (KHAMIS)

SOALAN NO.10

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan peratusan peningkatan tarif baru berkenaan cadangan Kementerian untuk mengenakan caj yang lebih tinggi di waktu puncak penggunaan elektrik serta peratusan pengurangan caj tersebut kepada pengguna luar waktu puncak.

JAWAPAN

Tuan Yang di-Pertua,

Untuk makluman Ahli Yang Berhormat,

1. Skim tarif berdasarkan masa penggunaan atau *Enhanced Time of Used* (EToU), dengan izin, telah diperkenalkan kepada pengguna komersial dan industri Tenaga Nasional Berhad (TNB) sejak 1 Januari 2016. Skim EToU ini tidak bersifat mandatori dan ia ditawarkan sebagai pilihan kepada pengguna. Oleh itu, pengguna bebas untuk memilih sama ada ingin mengekalkan skim tarif asal ataupun menukar kepada skim baharu EToU ini.

2. Buat masa ini, skim EToU belum lagi diperkenalkan kepada pengguna domestik atau kediaman. Untuk makluman Ahli Yang Berhormat, pihak Suruhanjaya Tenaga masih lagi dalam proses

mengkaji kadar yang sesuai serta tempoh zon masa waktu puncak, pertengahan puncak dan luar puncak untuk diperkenalkan kepada pengguna domestik menjelang suku pertama tahun 2021.

3. Melalui skim EToU ini, pengguna boleh mengawal penggunaan elektrik mereka. Skim ini menggalakkan pengguna untuk menggunakan elektrik dengan lebih efisien di mana pengguna boleh mengurangkan penggunaan elektrik pada waktu puncak di mana kadar tarifnya adalah lebih tinggi berbanding penggunaan elektrik ketika waktu pertengahan dan luar puncak yang mana kadar tarifnya adalah lebih rendah untuk aktiviti yang sama. Oleh itu, sekiranya pengguna beroperasi pada luar waktu puncak, mereka akan dapat menikmati kadar tarif yang lebih rendah sekali gus mengurangkan bil elektrik mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 21 NOVEMBER 2019 (KHAMIS)

SOALAN NO. 11

Minta **MENTERI PERTANIAN DAN INDUSTRI ASAS TANI** menyatakan adakah Kementerian akan memberi subsidi pemasangan Sistem Pengenalan Automatik (AIS) untuk semua kapal penangkapan ikan yang berlesen di Sabah dalam meningkatkan keselamatan operasi industri perikanan.

JAWAPAN

Yang di-Pertua,

1. Pemasangan Sistem Pengenalan Automatik (AIS) di atas vesel penangkapan ikan merupakan salah satu inisiatif Kementerian bagi memantau pergerakan vesel bertujuan untuk:

- Mengelakkan pencerobohan vesel pukat tunda di zon A;
- Melaksanakan pemantauan, pengawalan dan pengawasan (MCS) secara berkesan;
- Mengenalpasti vesel penangkapan ikan yang aktif;
- Mencegah *transshipment* membabitkan penjualan minyak bersubsidi dan ikan di tengah laut; dan
- Menjaga keselamatan nelayan serta memberi amaran bantuan kepada vesel yang mengalami situasi kecemasan.

2. Pada tahun 2015, Kerajaan telah memperuntukkan sebanyak RM20 juta bagi pemasangan AIS secara percuma ke atas 2,630 vesel pukat tunda, pukat jerut dan kenka dua bot di zon B sahaja. Pelaksanaan pemasangan alat AIS tidak melibatkan negeri Sabah kerana Jabatan Perikanan Sabah (DOF Sabah) pada waktu itu sedang melaksanakan integrasi sistem *Vessel Monitoring System* (VMS). Selain itu, negeri Sabah juga menggunakan kaedah pengezonan kawasan penangkapan ikan yang berbeza dengan Semenanjung Malaysia dan Sarawak.

3. Kementerian ini menyokong dan menggalakkan Kerajaan Negeri Sabah untuk melaksanakan pemasangan AIS ke atas vesel penangkapan ikan di Sabah. Peruntukan bagi pemasangan AIS ini akan dipohon di dalam Rancangan Malaysia Ke-12 sekiranya ada keperluan daripada DOF Sabah bagi tujuan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan hala tuju dan rancangan masa hadapan bagi semua Institut Pendidikan Guru (IPG) di negara ini.

JAWAPAN

Tuan Yang di-Pertua,

Untuk makluman Ahli Yang Berhormat, satu jawatankuasa khas akan dibentuk oleh Kementerian Pendidikan Malaysia (KPM) bagi meneliti hala tuju dan perancangan masa hadapan Institut Pendidikan Guru (IPG). Sehingga kini, kesemua 27 IPG di seluruh negara adalah dikekalkan bagi melaksanakan fungsi latihan perguruan serta latihan pembangunan profesionalisme guru dalam perkhidmatan.

Mesyuarat Jemaah Menteri pada 24 Mei 2017 telah memutuskan bahawa sembilan IPG ditukar fungsi kepada Kolej Vokasional, Politeknik dan Pusat Jurulatih TVET. Walau bagaimanapun, sehingga kini sembilan IPG tersebut dipersetujui agar wujud bersama (*co-exist*) dengan Kolej Vokasional dan Politeknik. Manakala IPG Raja Melewar pula wujud bersama (*co-exist*) Kolej GENIUS pintar UKM. Hasrat KPM juga untuk mengekalkan keadaan status quo 10 IPG tersebut sebagai '*co-exist*' dengan institusi TVET dan GENIUS.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN MUSLIMIN BIN YAHAYA
[SUNGAI BESAR]**

TARIKH : 21 NOVEMBER 2019 (KHAMIS)

SOALAN

**Tuan Muslimin Bin Yahaya [Sungai Besar] minta MENTERI
PEMBANGUNAN WANITA, KELUARGA DAN MASYARAKAT**
menyatakan bilangan kaunselor berdaftar seluruh negara dan fungsi
mereka membantu masalah tekanan perasaan kalangan rakyat Malaysia.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat memandang berat masalah tekanan perasaan ini. Sehingga 31 Oktober 2019, terdapat seramai 8,926 orang kaunselor berdaftar di seluruh negara.

Kementerian melalui Agensi di bawahnya iaitu Bahagian Psikologi dan Kaunseling, Jabatan Kebajikan Masyarakat, Unit Kaunseling, Lembaga Pembangunan Penduduk dan Keluarga Negara dan Bahagian Bimbingan dan Kaunseling, Jabatan Pembangunan Wanita mempunyai 212 Pegawai Psikologi yang mana 202 daripada itu adalah Kaunselor Berdaftar.

Kaunselor Berdaftar di Kementerian ini memberikan khidmat kepakaran mereka dalam bidang kaunseling dengan memfokuskan kepada masyarakat berdasarkan kumpulan sasar Kementerian. Kaunselor Berdaftar ini ditempatkan di seluruh Negeri dan daerah bagi memberikan perkhidmatan kaunseling kepada masyarakat dalam menghadapi masalah kesihatan mental ini. Antara perkhidmatan yang diberikan adalah Intervensi Kaunseling, Intervensi Psiko Pendidikan, Perundingan dan Konsultasi, Intervensi Psikologi dan Intervensi Krisis.

Kementerian juga melalui kerjasama strategik dengan kementerian dan agensi kerajaan yang lain, NGO dan pengamal persendirian juga turut memberikan perkhidmatan kaunseling kepada masyarakat dalam menghadapi masalah kesihatan mental ini, di mana terdapat seramai 8,926 orang kaunselor berdaftar di pelbagai agensi perkhidmatan awam, seperti bidang perguruan, sektor pengajian tinggi, NGO dan pengamal persendirian turut sama-sama memberikan perkhidmatan ini bagi menangani isu tekanan perasaan atau kesihatan mental ini.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
(JERANTUT)**

TARIKH : 21 NOVEMBER 2019 (KHAMIS)

SOALAN

Minta **MENTERI PERTAHANAN** menyatakan adakah kementerian bercadang mengecilkan jumlah anggota tentera kerana menerima tekanan daripada luar dan juga akibat dari kekurangan dana daripada Kerajaan.

JAWAPAN

Tuan Yang di-Pertua,

Kerajaan sangat prihatin dan sentiasa berusaha mengambil langkah-langkah yang sewajarnya untuk memastikan kesiapsiagaan dan keupayaan Angkatan Tentera Malaysia (ATM) sentiasa berada ditahap yang terbaik bagi memastikan kedaulatan negara sentiasa terpelihara dalam menghadapi pelbagai ancaman yang merentasi pelbagai spektrum sama ada ancaman berbentuk tradisional mahupun ancaman bukan tradisional.

Justeru, bilangan anggota tentera yang sedia ada adalah jumlah yang sewajarnya berdasarkan kepada penugasan dan senario ancaman semasa. Walau bagaimanapun, kerajaan sentiasa mengkaji keperluan keanggotaan dari semasa ke semasa seiring dengan perkembangan geopolitik serantau serta isu-isu persempadanan yang ada sekarang.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan

- (a) apakah rancangan Kementerian untuk menambahkan bilangan Sekolah Menengah Pendidikan Khas; dan
- (b) bilangan murid berkeperluan khas (peringkat sekolah rendah dan menengah) yang berjaya ditempatkan dalam kelas-kelas arus perdana dibandingkan dengan jumlah keseluruhan, bagi setiap tahun 2014 hingga kini.

JAWAPAN

Tuan Yang di-Pertua,

- (a) Dasar Pendidikan Khas Kementerian Pendidikan Malaysia (KPM) adalah untuk memberi peluang kepada murid berkeperluan khas (MBK) mendapat akses pendidikan yang sesuai dan relevan dengan kebolehan masing-masing supaya mereka dapat berdikari dan menjalani hidup yang berkualiti. Pendidikan bagi MBK dilaksanakan di Sekolah Pendidikan Khas, Program Pendidikan Khas Integrasi (PPKI) dan Program Pendidikan Inklusif (PPI).

Sehubungan itu, bagi memastikan MBK juga mendapat peluang pendidikan sehingga ke peringkat menengah, KPM telah merancang pembinaan dua (2) buah sekolah menengah iaitu Sekolah Menengah Pendidikan Khas Bumbong Lima di Pulau Pinang yang dijangka beroperasi pada tahun 2021 dan Sekolah Menengah Pendidikan Khas Vokasional Padawan di Kuching dijangka akan memulakan pembinaan pada tahun 2020.

- (b) Bilangan murid berkeperluan khas (MBK) yang ditempatkan di kelas arus perdana atau Program Pendidikan Inklusif (PPI) Arus Perdana adalah seramai 5,376 orang pada tahun 2014; 10,657 orang pada tahun 2015; 14,392 orang pada tahun 2016; 15,480 orang pada tahun 2017; 15,734 orang pada tahun 2018; dan 15,961 orang bagi data Jun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 21 NOVEMBER 2019 (KHAMIS)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan sama ada Kementerian berhasrat untuk membuka kuota baru sekiranya kuota *Net Energy Metering* (NEM) pada 500MW sehingga tahun hadapan habis digunakan.

JAWAPAN

Tuan Yang di-Pertua,

Untuk makluman Ahli Yang Berhormat,

Sehingga 30 September 2019, sebanyak 82.55 Megawatt (MW) atau 16.56% kuota telah diluluskan di bawah program *Net Energy Metering* (NEM). Daripada jumlah tersebut, sebanyak 28.54MW telah mula beroperasi atau disambungkan ke grid TNB.

Kementerian menerusi SEDA Malaysia akan terus melaksanakan pelbagai program secara berterusan bagi tujuan mempromosikan program NEM ini. Sekiranya 500MW tersebut mendapat sambutan dan habis digunakan pada 2020, Kementerian akan melihat semula keperluan kuota atau program seumpamanya bagi terus menjayakan hasrat Kerajaan ke arah pencapaian sasaran 20% tenaga boleh baharui pada 2025.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : DATO' SERI AHMAD FAIZAL BIN DATO' AZUMU
[TAMBUN]**

TARIKH : 21 NOVEMBER 2019

SOALAN

DATO' SERI AHMAD FAIZAL BIN DATO' AZUMU [TAMBUN] minta **MENTERI DALAM NEGERI** menyatakan langkah-langkah yang strategik bagi membendung pencerobohan di sempadan negeri Perak yang mana ia boleh menimbulkan ancaman dalam pelbagai aspek keselamatan, penyeludupan dan jenayah merentasi kedaulatan negara.

JAWAPAN

Tuan Yang Di Pertua,

Kerajaan sentiasa peka terhadap isu berhubung pencerobohan di sempadan negara dimana ia boleh menimbulkan ancaman dari pelbagai aspek termasuk keselamatan penduduk sekitar, penyeludupan dan jenayah merentasi sempadan termasuklah di sempadan darat negeri Perak.

Antara langkah-langkah pencegahan strategik kerajaan dalam menangani isu keselamatan di sempadan darat Negara adalah dengan memperkukuhkan peralatan dan aset kepada anggota penguatkuasaan. Dalam konteks ini, Kementerian Dalam Negeri telah menyediakan sebanyak lebih kurang RM 2,034,267,810.00 kepada Polis Diraja Malaysia (PDRM),

Jabatan Imigresen Malaysia (JIM) dan Agensi Kawalan Sempadan Malaysia (AKSEM) bagi tujuan perolehan peralatan dan aset keselamatan.

Selain daripada itu, pelaksanaan operasi secara bersepadu dan gunasama aset antara agensi penguatkuasaan di kawasan sempadan darat Negara turut dilaksanakan selain kerjasama antara agensi dari dalam dan luar negara yang melibatkan perkongsian maklumat risikan sentiasa dipertingkatkan sabagai salah satu langkah strategik dalam usaha mengekang aktiviti penyeludupan dan jenayah di sempadan negara. Aktiviti pemantauan dan operasi harian turut dipertingkatkan terutama di kawasan yang dikenali sebagai laluan haram yang dipercayai digunakan oleh sindiket penyeludupan dan aktiviti rentas sempadan termasuk di sempadan negeri Perak.

Sehingga kini, pelaksanaan operasi secara bersepadu melibatkan pelbagai agensi seperti Ops Wawasan di Negeri Kedah Perlis dan Kelantan (PDRM), Ops Gading di Cameron Highland (PDRM dan Jabatan Imigresen Malaysia) serta Ops Bersepadu Khazanah di negeri di semenanjung Malaysia (PGA dan Jabatan PERHILITAN) masih dilaksanakan bagi mengekang kemasukan elemen-elemen berkepentingan termasuk jenayah rentas sempadan, penyeludupan dan kemasukan pendatang tanpa izin di sempadan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGKAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 21 NOVEMBER 2019 (KHAMIS)

SOALAN

Minta **MENTERI PERTANIAN DAN INDUSTRI ASAS TANI** menyatakan apakah usaha Kementerian untuk membantu merealisasikan cadangan penanaman buah anggur dan strawberi di puncak Gunung Jerai sebagai satu langkah untuk memajukan ekonomi setempat.

JAWAPAN

Yang di-Pertua,

1. Anggur dan strawberi merupakan buah *temperate* yang sesuai ditanam di kawasan tanah tinggi bersuhu antara 15 °C – 26 °C. Bagi menyokong pertumbuhan industri penanaman anggur dan strawberi, MARDI telah mengeluarkan Manual Teknologi Penanaman Strawberi secara fertigasi di bawah struktur pelindung hujan manakala Jabatan Pertanian (DOA) telah menerbitkan risalah Panduan Menanam Anggur. Di samping itu, MARDI turut mengambil inisiatif mempamerkan teknologi tanaman strawberi dan anggur di Taman Agroteknologi Cameron Highlands dan Langkawi.
2. Cadangan penanaman buah anggur dan strawberi di puncak Gunung Jerai adalah satu cadangan yang baik memandangkan puncak tersebut mempunyai julat suhu yang bersesuaian untuk tanaman

tersebut. Walaubagaimanapun, faktor muka bumi Gunung Jerai yang curam serta kekurangan kawasan rata menghadkan aktiviti pertanian di kawasan tersebut. Selain itu, Gunung Jerai merupakan kawasan hutan simpan kekal yang telah diwartakan sebagai Jerai Geopark di mana hutan semulajadi perlu dikekalkan.

3. Jabatan Pertanian telah menerbitkan buku Panduan Pembangunan Pertanian di Tanah Bercerun sebagai rujukan untuk penanaman di kawasan tanah tinggi. Namun begitu, kos pembangunan projek penanaman anggur dan strawberi tersebut adalah sangat tinggi dan tidak ekonomik untuk dilaksanakan dalam skala besar dan komersil di puncak Gunung Jerai.

4. Sehubungan dengan itu, Kementerian berpandangan aktiviti penanaman buah anggur dan strawberi di puncak Gunung Jerai boleh diusahakan sebagai tarikan pengunjung ke puncak Gunung Jerai melalui program agropelancongan yang boleh menjana pendapatan tinggi dan bukan sebagai perladangan komersil. Kementerian melalui Jabatan Pertanian dan MARDI bersedia untuk memberi khidmat nasihat teknikal kepada pengusaha yang berminat untuk menanam anggur dan strawberi di Gunung Jerai dan seterusnya memajukan ekonomi setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : DR. KELVIN YII LEE WUEN
[BANDAR KUCHING]
TARIKH : 21 NOVEMBER 2019 (KHAMIS)

SOALAN NO. 19

Minta **MENTERI PENDIDIKAN** menyatakan sejauh mana kesediaan Kementerian dalam melaksanakan Dasar Pendidikan Percuma terutamanya dan juga pendidikan percuma di peringkat IPTA dan bilakah ianya akan dilaksanakan.

JAWAPAN

Tuan Yang di-Pertua,

Dasar Pendidikan Percuma

Untuk makluman Ahli Yang Berhormat, pendidikan percuma telah dilaksanakan di peringkat prasekolah hingga lepasan menengah bagi institusi pendidikan kerajaan di samping pemberian bantuan persekolahan di bawah Kementerian Pendidikan Malaysia (KPM). Pada masa kini yuran khas sekolah dan bantuan tambahan persekolahan yang sebelum ini dibayar oleh ibu bapa atau penjaga murid pada awal tahun persekolahan telah dimansuhkan.

Kos Pembelajaran dan Pengajaran (PdP), aktiviti sukan, kokurikulum dan program pembangunan sahsiah diri murid adalah ditanggung sepenuhnya oleh Kerajaan untuk semua murid di Sekolah Kerajaan dan Sekolah Bantuan Kerajaan berdasarkan enrolmen tahun semasa melalui lima (5) jenis Bantuan Umum seperti berikut :

- i. Bantuan Geran Per Kapita (PCG)
- ii. Bantuan Per Kapita Pra Sekolah
- iii. Bantuan Makanan Pra Sekolah
- iv. Bantuan Sukan Sekolah
- v. Bantuan Bayaran Tambahan Persekolahan

Sektor Pendidikan Tinggi

Manakala pendidikan di peringkat pendidikan tinggi pula adalah hampir percuma iaitu pelajar hanya membayar 10 peratus sahaja daripada kos sebenar program akademik. Ini bermakna setiap pelajar universiti awam secara tidak langsung menerima 90 peratus subsidi daripada Kerajaan. Yuran ini tidak pernah dinaikkan walaupun kos untuk program berkaitan bertambah setiap tahun. Senario ini dapat dilihat jika program yang sama ditawarkan di institusi pendidikan tinggi swasta (IPTS) pada harga yang lebih tinggi. Contohnya program perubatan di Universiti Malaya di mana kos program yang perlu dibayar oleh pelajar adalah berjumlah **RM14,200** berbanding dengan kos program perubatan di UCSI sebanyak **RM260,000**.

Kelestarian kemampuan kewangan kerajaan untuk membiayai institusi pendidikan tinggi awam secara berterusan serta inisiatif membolehkanupayakan institusi untuk menjana pendapatan mereka sendiri tanpa menjejaskan kualiti pendidikan yang diberikan adalah faktor utama yang perlu diberi perhatian. KPM sedang melaksanakan kajian yang terperinci bagi melihat kebolehlaksanaan pendidikan percuma di universiti awam, politeknik dan kolej komuniti di bawah KPM.

Namun begitu, KPM tetap menyediakan bantuan kewangan melalui pinjaman Perbadanan Tabung Pendidikan Tinggi Negara (PTPTN) kepada pelajar-pelajar yang memerlukan. Ini bagi memastikan pelajar yang berkeelayakan akan diberi peluang untuk menyertai pendidikan tinggi atas dasar inklusiviti. Di samping itu, di peringkat pendidikan tinggi juga, KPM turut menyediakan bantuan secara bersasar terutamanya kepada golongan B40 melalui bantuan kewangan pelajar asasi IPTA, bantuan kewangan pelajar matrikulasi, bantuan kewangan kolej komuniti, bantuan kewangan orang kurang upaya, elaun bantuan sara hidup dan biasiswa.

Perlembagaan setiap universiti awam juga telah memberi kuasa kepada universiti untuk menetapkan kadar yuran yang akan dikenakan bagi program pengajian. Pihak universiti akan membuat kajian pasaran yang menyeluruh bagi sesuatu kursus dan impaknya terhadap pelajar dan universiti itu sendiri sebelum sebarang keputusan diangkat ke Lembaga Pengarah Universiti (LPU).

Dari sudut Jabatan Pendidikan Politeknik dan Kolej Komuniti (JPPKK) pula, pihak Kementerian belum bercadang untuk menyemak semula yuran akademik di Politeknik dan Kolej Komuniti kerana kadar yuran pengajian semasa adalah sebanyak RM200 untuk satu semester (sekitar RM1.33 sehari) dan merupakan antara kadar yuran pengajian yang terendah di negara kita. Kadar ini dianggap amat munasabah dan tidak membebankan pelajar untuk meneruskan pengajian ke peringkat lebih tinggi.

Bagi pelajar yang menjalani Latihan Industri pada tahun akhir iaitu semester 6 bagi pelajar diploma dan semester 4 bagi pelajar sijil, mereka dikecualikan daripada membayar yuran pengajian. Ini disebabkan mereka tidak menggunakan fasiliti dan kemudahan di Politeknik atau Kolej Komuniti.

Dalam usaha kerajaan untuk merealisasikan dasar pendidikan percuma ini, Kementerian kini sedang mengkaji feasibility/keupayaan dan kebolehlaksanaan Kerajaan dalam memberikan pendidikan percuma kepada pelajar yang layak. Melalui kajian ini, beberapa model pendidikan sedang dipertimbangkan dan pengiraan terperinci berkaitan perkara ini sedang dilaksanakan. Perbincangan dan sesi libat urus bersama-sama pihak Kementerian Kewangan (MOF) dan universiti awam juga turut diadakan supaya hasrat ini dapat direalisasikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 20.11.2019 (RABU)

SOALAN NO. 20

DATO' SRI BUNG MOKTAR BIN RADIN [KINABATANGAN] minta **MENTERI KEWANGAN** menyatakan apakah usaha pihak Kerajaan dalam membantu meringankan beban masyarakat yang kurang berkemampuan dalam menghadapi peningkatan kos sara hidup masa kini yang kian meruncing.

JAWAPAN

Tuan Yang di-Pertua,

Untuk makluman, Kerajaan telah mengambil pelbagai inisiatif bagi membantu meringankan beban masyarakat yang kurang berkemampuan dalam menghadapi peningkatan kos sara hidup masa kini antaranya adalah:

- (i) Menguatkuasakan **Akta Kawalan Harga dan Antipencatutan 2011** bagi mengawal pengambilan keuntungan secara tidak munasabah oleh peniaga;
- (ii) Melaksanakan dan memanjangkan **Skim Harga Maksimum Musim Perayaan (SHMMP)** pada musim perayaan utama;
- (iii) Menguatkuasakan **Perintah Kawalan Harga (Penandaan Harga oleh Penjual Runcit) 1993** bagi mewajibkan peniaga meletakkan tanda harga atau senarai harga ke atas barangan yang dijual;
- (iv) Mewujudkan **Skuad Tindakan Aduan dan Resolusi (STAR)** dan **Special Action Squad (SAS)** untuk menyelesaikan aduan rakyat dengan **cepat dan pantas**;
- (v) Menjalankan **pemantauan harga barangan keperluan asas di seluruh negara** di bawah **Program Pemantauan Harga** oleh **Pegawai Pemantau Harga Kementerian**;
- (vi) Meningkatkan kerjasama antara Kementerian dan pengguna sebagai ejen penyaluran dan sebaran maklumat kepenggunaan, terutama mengenai isu harga barang contohnya inisiatif **Rakan KPDNHEP**; dan
- (vii) Mempromosikan **medium interaktif** bagi memudahkan rakyat membuat perbandingan harga melalui aplikasi pintar **PriceCatcher** dan mengemukakan aduan melalui aplikasi **Ez Adu**.

- (viii) **Tindakan memecahkan monopoli/kartel** bagi industri-industri yang boleh diliberalisasikan. Ia bertujuan untuk mewujudkan persaingan sihat yang membolehkan pengguna dapat membeli barangan dengan harga yang lebih kompetitif. Usaha ini diletakkan di bawah Suruhanjaya Persaingan (MyCC) untuk memastikan tiada pemain industri yang dominan dalam pasaran.
- (ix) Program Penyeragaman Harga turut diperkenalkan bagi membolehkan rakyat di kawasan pedalaman dan terpencil menikmati harga barang keperluan asas yang sama dengan kawasan bandar.
- (x) Kerajaan juga mengambil inisiatif dalam menambahbaik pendapatan boleh guna rakyat melalui pelbagai inisiatif mengurangkan kos sara hidup rakyat melalui pelbagai bantuan-bantuan tunai dan subsidi Kerajaan seperti Bantuan Sara Hidup serta subsidi pengangkutan seperti Pas My100 dan My50.
- (xi) KPDNHEP turut bekerjasama dengan Kementerian berkaitan seperti Kementerian Pertanian dan Industri Asas Tani (MOA) dalam memastikan harga barangan makanan yang stabil melalui bekalan yang mencukupi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SERI MUKHRIZ TUN DR. MAHATHIR
(JERLUN)**

TARIKH : 21 NOVEMBER 2019

SOALAN

DATO' SERI HAJI MUKHRIZ BIN TUN DR. MAHATHIR [JERLUN] minta **MENTERI DALAM NEGERI** menyatakan hasil langkah Kerajaan membuka pintu 24 jam sempadan Malaysia-Thailand di Bukit Kayu Hitam untuk kenderaan berat. Apakah dapatan dari percubaan selama tiga bulan sejak ia dilaksanakan pada 18 Jun lepas. Adakah langkah itu berhasil mengurangkan tempoh pemeriksaan dan kesesakan kenderaan perdagangan di Kompleks Imigresen, Kastam, Kuarantin dan Keselamatan Bukit Kayu Hitam.

JAWAPAN

Tuan Yang Di Pertua,

Untuk makluman Ahli Yang Berhormat, pelaksanaan operasi 24 jam bagi kenderaan berat melalui Kompleks Imigresen, Kastam dan Kuarantin (ICQS) Bukit Kayu Hitam yang bermula pada 16 Jun 2019 selama tempoh 3 bulan telah berakhir pada 17 September 2019 yang lalu.

Bagi tujuan menilai keberkesanan tempoh percubaan pelaksanaan operasi 24 jam, satu Jawatankuasa Penilai telah diwujudkan oleh kedua-dua buah negara bagi menilai jumlah pergerakan keluar masuk dan peningkatan aktiviti perdagangan, aspek keselamatan dan implikasi sosio ekonomi.

Berdasarkan kajian awal yang telah dijalankan, didapati bahawa bilangan kenderaan berat dan bermuatan yang keluar masuk ke Kompleks ICQS Bukit Kayu Hitam selepas jam 12.00 tengah malam adalah rendah iaitu 25 lori bermuatan bagi bulan Jun 2019 dan 42 lori bermuatan bagi bulan Julai 2019. Kajian turut mendedahkan bahawa salah satu faktor keadaan ini berlaku adalah kerana rata-rata pemain industri kurang arif atau sedar tentang pengoperasian 24 jam di Kompleks ICQS Bukit Kayu Hitam dan CIQ Sadao.

Justeru, kedua-dua negara telah bersetuju untuk melanjutkan tempoh percubaan kepada 9 bulan menjadikan tempoh keseluruhan selama 12 bulan. Pelanjutan tempoh percubaan operasi 24 jam memberi peluang kepada kementerian/agensi dan Kerajaan Negeri untuk meningkatkan aktiviti hebahan dan promosi selain memberi ruang kepada pihak industri untuk membuat persediaan dan perubahan dari segi jadual dan rundingan dengan rakan niaga yang berkaitan serta menyesuaikan aktiviti dagangan dan logistik selaras dengan perubahan dasar semasa oleh pihak Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 21 NOVEMBER 2019 (KHAMIS)

SOALAN NO. 22

Minta **MENTERI PERTANIAN DAN INDUSTRI ASAS TANI** menyatakan keberkesanan tindakan yang telah diambil setakat ini bagi membanteras kegiatan pencerobohan nelayan asing ke perairan negara. Apakah faktor-faktor yang menyebabkan isu ini tidak selesai.

JAWAPAN

Yang di-Pertua,

1. Pencerobohan vesel nelayan asing sering berlaku di perairan negara dengan kebanyakan kes melibatkan vesel daripada Vietnam, Thailand, Indonesia dan Filipina. Kementerian ini menganggarkan sebanyak RM3 bilion hingga RM6 bilion hasil laut negara hilang setiap tahun akibat daripada aktiviti pencerobohan vesel nelayan asing tersebut. Pengiraan anggaran ini dibuat berdasarkan kepada data daripada Agensi Penguatkuasaan Maritim Malaysia (APMM) dan kajian teknikal yang dijalankan oleh Jabatan Perikanan Malaysia (DOF).

2. Dalam membanteras kegiatan pencerobohan vesel nelayan asing di perairan negara, Kementerian telah mengambil beberapa tindakan seperti berikut:

- (i) Melaksanakan operasi penguatkuasaan bersepadu di kawasan '*hotspot*' yang melibatkan Kementerian Dalam Negeri, Kementerian Pertahanan dan Kementerian Pertanian dan Industri Asas Tani. Merujuk kepada laporan APMM, sehingga bulan Oktober 2019, sebanyak 162 vesel nelayan asing yang menceroboh perairan negara telah ditahan melalui Ops NAGA dan GELORA Khas.
- (ii) Memantau pergerakan vesel penangkapan ikan di perairan negara secara *real-time* melalui skrin pemantauan bilik operasi DOF. Vesel nelayan asing yang menceroboh perairan negara akan dilaporkan kepada APMM bagi tujuan perkongsian data untuk tindakan bersama. Pada tahun 2019, sebanyak 284 laporan telah dikemukakan oleh DOF kepada APMM.
- (iii) Mempergiatkan program pemutihan vesel laut dalam berdasarkan undang-undang, syarat dan dasar pelesenan yang ditetapkan bagi memastikan lesen yang diluluskan adalah pengusaha yang benar-benar tulen sahaja. Pada tahun 2019, sebanyak 51 lesen vesel laut dalam telah dibatalkan di bawah program ini.

3. Kementerian percaya tindakan yang dilaksanakan secara berterusan ini berkesan dalam mengekang kegiatan pencerobohan vesel nelayan asing daripada terus berleluasa. Namun, terdapat beberapa faktor-faktor lain yang menyebabkan isu ini tidak dapat diselesaikan sepenuhnya seperti berikut:

- Keluasan perairan negara adalah luas;
- Keupayaan penguatkuasaan secara "omnipresence" tidak dapat dilaksanakan kerana kekangan aset sedia ada dan pegawai di lapangan adalah terhad; dan
- Komitmen dan kerjasama negara serantau dalam mengawal pergerakan vesel nelayan negara masing-masing.

4. Kementerian juga amat komited untuk meningkat kerjasama strategik di dalam dan luar negara bagi membanteras pencerobohan nelayan asing di perairan negara.

5. Selaras dengan pembangunan teknologi, DOF kini sedang melaksanakan '*pilot project*' bagi menggunakan *Quick Response Code* - *QR* dan *Radio Frequency Identification* - *RFID* ke atas vesel laut dalam sebagai kaedah identifikasi vesel tempatan di laut. Langkah ini bertujuan untuk mengurangkan pengklonan vesel nelayan tempayan dan pencerobohan vesel nelayan asing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan: -

- (a) jumlah pelajar sekolah rendah Tahun 6 yang tidak melanjutkan pelajaran ke Tingkatan 1; dan
- (b) kesediaan Kementerian untuk meminda Seksyen 29A(2) Akta Pendidikan 1996 untuk menjadikan pelajaran menengah wajib bagi semua rakyat Malaysia.

JAWAPAN

Tuan Yang di-Pertua,

- (a) Data Kementerian Pendidikan Malaysia (KPM) pada September 2019 menunjukkan bahawa terdapat seramai 46,140 orang murid Tahun 6 yang tidak melanjutkan pelajaran ke Tingkatan 1. Antara sebab yang telah dikenal pasti murid tahun enam tidak melanjutkan pelajaran ke Tingkatan 1 adalah kerana bekerja, melanjutkan pendidikan di institusi pendidikan swasta, melanjutkan pengajian ke sekolah agama/ pondok dan institusi pendidikan lain, masalah keluarga, dan meninggal dunia. Statistik transisi murid cicir daripada Tahun 6 ke Tingkatan 1 di Malaysia menunjukkan trend yang menurun iaitu 4.94 peratus pada tahun 2016 ke 3.19 peratus pada tahun 2018.

KPM juga telah menyediakan satu garis panduan bagi membantu murid-murid yang berisiko untuk cicir iaitu Garis Panduan Mengurus Murid Berisiko Cicir di Sekolah (GPMBC) yang berkuat kuasa pada 1 Jun 2018 untuk semua sekolah kerajaan dan bantuan kerajaan. GPMBC ini mempunyai objektif bagi memastikan pemantauan murid khususnya murid berisiko cicir dapat dibuat oleh pihak Jabatan Pendidikan Negeri (JPN), Pejabat Pendidikan Daerah (PPD) dan sekolah secara berterusan.

- (b) Berkaitan cadangan meminda Seksyen 29A(2) Akta Pendidikan, 1996, Kementerian Pendidikan Malaysia (KPM) telah menyediakan draf Rang Undang-Undang (RUU) Pendidikan (Pindaan) – Pendidikan Wajib 11 Tahun kepada murid-murid bermula sekolah rendah sehingga tamat sekolah menengah di peringkat Sijil Pelajaran Malaysia (SPM). Walau bagaimanapun, draf RUU tersebut hanya akan dibentangkan di Parlimen setelah Laporan Jawatankuasa Kajian Dasar Pendidikan selesai diteliti dan diambil kira oleh KPM.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB DATO' SERI DR. SANTHARA (SEGAMAT)

TARIKH : 21 NOVEMBER 2019

SOALAN

DATO' SRI DR. SANTHARA [SEGAMAT] minta **MENTERI DALAM NEGERI** menyatakan mengapa penukaran kad pengenalan merah ke biru yang dijanjikan oleh Tun Dr. Mahathir sewaktu perjumpaan dengan wakil-wakil rakyat India masih belum terlaksana (golongan umur 60 tahun ke atas). Bilakah ianya akan dilaksanakan.

JAWAPAN

Tuan Yang Di-Pertua,

Kementerian Dalam Negeri (KDN) telah melaksanakan tindakan segera selaras dengan pengumuman YAB Perdana Menteri pada 14 Ogos 2018 serta keputusan Mesyuarat Jemaah Menteri pada 17 Ogos 2018 agar pemegang MyPR berumur 60 tahun dan ke atas yang memenuhi syarat di bawah Bahagian III Perlembagaan Persekutuan, *Citizenship Rules* 1964 [LN.82/1964] serta perundangan berkaitan yang berkuat kuasa seperti peraturan imigresen, keberadaan yang sah dan lain-lain dipertimbangkan untuk dianganugerahkan kewarganegaraan Malaysia.

Untuk makluman Ahli Yang Berhormat, Kementerian ini telah menerima sebanyak 1,667 permohonan daripada pemegang Kad Pengenalan Pemastautin Tetap (MyPR) berumur 60 tahun dan ke atas yang berketurunan India. Kesemua permohonan tersebut telah selesai diproses dengan 1,641 permohonan diluluskan manakala baki 26 permohonan ditolak. Dalam hal ini, pemohon yang telah menerima surat kelulusan daripada KDN perlu hadir ke JPN untuk urusan mengangkat sumpah di bawah Jadual Pertama Perlembagaan Persekutuan, pembayaran fi dan pengeluaran Sijil Warganegara sebelum dibenarkan untuk mengemukakan permohonan Kad Pengenalan (MyKad).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 21 NOVEMBER 2019 (KHAMIS)

SOALAN NO. 25

Minta **MENTERI PERTANIAN DAN INDUSTRI ASAS TANI** menyatakan apakah Kementerian merancang untuk membuka semula permohonan lesen perikanan nelayan memandangkan terdapat ramai nelayan baharu yang dahulunya nelayan tetapi bekerja disebabkan peluang pekerjaan yang luas dan kini menjadi nelayan semula disebabkan kejatuhan ekonomi seperti yang berlaku di Labuan.

JAWAPAN

Yang di-Pertua,

1. Pembekuan sementara ke atas semua permohonan baru lesen vesel zon A, B dan C telah dilaksanakan sejak tahun 1982 bertujuan untuk mengurangkan tekanan ke atas sumber perikanan negara. Merujuk kepada Kajian Taksiran Sumber Perikanan 2016 oleh Jabatan Perikanan Malaysia, tahap eksploitasi berlebihan terus berlaku di mana sumber perikanan telah berkurang kepada 15 peratus, iaitu 23,236 metrik tan daripada 150,710 metrik tan pada tahun 1970-an.
2. Berdasarkan kepada perangkaan tahun 2018, bilangan vesel penangkapan ikan yang berdaftar di seluruh Malaysia adalah berjumlah 52,556 vesel. Daripada jumlah tersebut, sebanyak 275 vesel telah didaftarkan di Labuan terdiri daripada 273 vesel pesisir pantai (zon A dan zon B) dan 2 vesel laut dalam (zon C2).
3. Kementerian sedang mengkaji kemungkinan untuk membuka semula permohonan lesen vesel zon A kepada mereka yang ingin menjadi nelayan. Penstrukturan semula ke atas dasar, syarat dan kriteria pemberian kuota lesen akan dicadangkan mengikut keupayaan daya tampungan pesisir pantai berdasarkan kepada sumber perikanan sedia ada.
4. Selain itu, keutamaan juga akan diberikan kepada golongan belia bagi meningkatkan penglibatan mereka dalam bidang perikanan tangkapan serta penggunaan teknologi moden yang mesra sumber bagi memastikan kelestarian sumber perikanan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ROBERT LAWSON CHUAT
[BETONG]**

TARIKH : 21 NOVEMBER 2019 (KHAMIS)

SOALAN NO. 26

Minta **MENTERI PENDIDIKAN** menyatakan apakah keputusan Kementerian mengenai cadangan untuk menutup Institut Pendidikan Guru (IPG) di Sarawak. Sekiranya Kementerian boleh menjamin pelatih dari Sarawak akan mendapat peluang sama rata dengan pelatih negeri lain.

JAWAPAN

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa KPM tidak mempunyai cadangan untuk menutup Institut Pendidikan Guru (IPG). Perkara ini telah dijelaskan melalui Kenyataan Media oleh KPM yang dikeluarkan pada 10 September 2019 yang bertajuk '*21 IPG Tutup Tahun Hadapan Tak Benar*'. Kesemua 27 IPG di seluruh negara adalah dikekalkan bagi melaksanakan fungsi latihan perguruan serta latihan pembangunan profesionalisme guru dalam perkhidmatan. Satu jawatankuasa khas sedang dibentuk bagi meneliti perancangan khusus dan hala tuju IPG.

Pengambilan pelajar Program Ijazah Sarjana Muda Perguruan (PISMP) IPG adalah berdasarkan unjuran yang telah ditetapkan oleh Kementerian Pendidikan Malaysia (KPM) bagi bekalan guru sekolah rendah mengikut jenis sekolah di seluruh Malaysia. Namun perlu ditegaskan bahawa dasar KPM adalah tidak mengabaikan peluang kepada mana-mana pelajar lepasan Sijil Pelajaran Malaysia (SPM) termasuk anak kelahiran Sarawak untuk memohon Program Pengajian Ijazah Sarjana Muda Perguruan (PPISMP) di IPG. Pemilihan calon guru dibuat berasaskan kepada kriteria skor merit calon, jantina, bidang yang ditawarkan, lulus Ujian Inventori Sahsiah Keguruan (INSAK) dan diperaku oleh panel temu duga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 21 NOVEMBER 2019 (KHAMIS)

SOALAN NO. 27

Minta **MENTERI PENDIDIKAN** menyatakan bilakah Kementerian Pelajaran dan Inovasi Sabah akan diberi autonomi sepenuhnya mengendalikan hal ehwal pembangunan pelajaran di negeri Sabah.

JAWAPAN

Tuan Yang di-Pertua,

Kementerian Pendidikan Malaysia (KPM) akur dengan akta dan peraturan sedia ada yang sedang berkuatkuasa mengenai pemberian autonomi pendidikan kepada kerajaan negeri. Untuk makluman, Akta Pendidikan 1996 [Akta 550] telah memperuntukkan bahawa semua institusi pendidikan di bawah KPM adalah tertakluk kepada bidang kuasa Menteri Pendidikan. Akta 550 merupakan dokumen perundangan yang menjadi rujukan berhubung apa-apa perkara yang berkait dengan pendidikan di semua institusi pendidikan dalam Sistem Pendidikan Kebangsaan. Akta 550 ini juga telah mengkanunkan segala hasrat dan aspirasi negara yang ingin dicapai melalui pelaksanaan Dasar Pendidikan Kebangsaan yang berpaksikan Falsafah Pendidikan Kebangsaan.

Selain itu, Perkara 74 dan 80 Perlembagaan Persekutuan, turut menyatakan bahawa Kerajaan Persekutuan mempunyai kuasa perundangan dan kuasa eksekutif dalam perkara berkaitan pendidikan sebagaimana yang dinyatakan dalam perenggan 13 Senarai I (Senarai Persekutuan) Jadual Kesembilan Perlembagaan Persekutuan.

Justeru, Kerajaan tidak bercadang untuk memberi kuasa kepada negeri Sabah untuk melaksanakan sistem pendidikan yang berbeza daripada dasar pendidikan Kerajaan Pusat. Walaupun begitu, KPM bersedia untuk mempergiatkan lagi jalinan kerjasama yang tersedia ada antara KPM dengan kerajaan negeri Sabah bagi memastikan pendidikan di negara ini berada dalam tahap yang terbaik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 21 NOVEMBER 2019 (KHAMIS)

SOALAN

Minta **MENTERI PERTANIAN DAN INDUSTRI ASAS TANI** menyatakan apakah hala tuju penangkapan ikan tuna laut dalam di Lautan Hindi dan apakah inisiatif Kementerian untuk menggalakkan penglibatan nelayan tempatan dalam industri tersebut.

JAWAPAN

Yang di-Pertua,

1. Perikanan tangkapan tuna di Lautan Hindi berpotensi besar untuk dikembangkan dan mempunyai permintaan yang tinggi daripada negara-negara pengimport seperti *European Union* (EU) dan Jepun. Pada tahun 2017, jumlah pendaratan tuna Lautan Hindi yang didaratkan di Malaysia berjumlah 2.78 ribu tan metrik dengan nilai sebanyak RM35.6 juta. Manakala jumlah eksport tuna pada tahun yang sama adalah sebanyak 1.68 ribu tan metrik dengan nilai berjumlah RM18 juta.

2. Kementerian telah menetapkan hala tuju penangkapan tuna laut dalam di Lautan Hindi berkonsepkan kepada pemacu sektor swasta (*private sector driven*). Bagi usaha ini, Kementerian telah merangka pelan strategi yang komprehensif dalam mewujudkan ekosistem

industri tuna yang mesra perniagaan dan pelaburan. Penumpuan pelan strategi tersebut adalah seperti berikut:

- Memastikan pematuhan peraturan domestik dan antarabangsa *Indian Ocean Tuna Commission* (IOTC);
- Membangunkan prasarana pendaratan dan rantai nilai industri tuna yang lengkap dengan kerjasama pihak Kerajaan Negeri seperti di Pulau Pinang dan Kedah;
- Menggalakkan pembangunan produk berasaskan tuna seperti sate tuna, burger tuna, tempura tuna dan serunding tuna;
- Mewujudkan model pembiayaan kewangan yang khusus untuk industri tuna bagi tujuan pemodenan vesel tuna tradisi;
- Mempertingkatkan penyelidikan dan pembangunan teknologi tangkapan tuna seperti pentaksiran stok tuna, maklumat biologi taburan dan migrasi spesies tuna, kajian ternakan tuna dalam sangkar serta program penyelidikan dan pengurusan tuna serantau; dan
- Memperkasakan pembangunan modal insan yang berkemahiran tinggi.

3. Selain itu, bagi menggalakkan penglibatan nelayan tempatan dalam industri tuna, Kementerian akan mengambil inisiatif seperti berikut:

- Menggalakkan pengusaha vesel laut dalam sedia ada yang mempunyai vesel bermuatan 100 GRT ke atas dan menggunakan peralatan rawai atau pukot jerut untuk menceburi industri tuna melalui program transformasi pemodenan vesel yang mematuhi keperluan syarat layar di lautan antarabangsa;

- Menubuhkan persatuan khusus di kalangan pemain industri tuna tempatan sedia ada bagi mengukuhkan keupayaan, jalinan kerjasama dan perkongsian maklumat di kalangan mereka;
- Memperkasakan Akademi Perikanan Malaysia di Chendering, Terengganu dan Kolej Perikanan Sultan Nazrin Shah Muizzuddin Shah di Lumut, Perak bagi menggalakkan dan meningkatkan keupayaan modal insan, khususnya golongan belia untuk menceburi sektor perikanan tangkapan; dan
- Menyediakan Insentif Pengecualian Cukai Pendapatan di bawah Akta Cukai Pendapatan 1967 bagi menarik minat syarikat tempatan untuk menceburi perikanan tangkapan tuna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 21 NOVEMBER 2019 (KHAMIS)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan jumlah kos bekalan elektrik yang dibayar oleh Kerajaan setiap bulan bagi semua bangunan awam dan pejabat agensi Kerajaan Persekutuan serta kos yang boleh diijimatkan melalui pemasangan panel solar.

JAWAPAN

Tuan Yang di-Pertua,

Untuk makluman Ahli Yang Berhormat,

Pembayaran bil elektrik bagi bangunan-bangunan awam dan pejabat agensi Kerajaan dibuat oleh kementerian atau agensi berkenaan dengan menggunakan peruntukan mengurus masing-masing. Secara prinsipnya, pemasangan panel solar di bangunan-bangunan melalui mekanisme *Net Energy Metering* (NEM) mampu menjimatkan sekurang-kurangnya 20%-50% daripada jumlah bil elektrik bergantung kepada kaedah pelaksanaannya sama ada ia dilakukan melalui *direct purchase* ataupun *solar leasing*.

Kerajaan telah pun melaksanakan inisiatif penjanaan tenaga boleh baharu (TBB) melalui solar PV untuk penggunaan sendiri (*self-*

consumption) di 26 bangunan-bangunan Kerajaan terpilih melalui inisiatif *Government Lead by Example* (GLBE). Jumlah kapasiti terpasang yang terkini di kesemua bangunan ini adalah sebanyak 0.740MW, dengan penjanaan elektrik berjumlah 3,991MWj setahun atau penjimatan elektrik kira-kira RM1.5juta setahun.

Inisiatif penjanaan TBB melalui Solar PV ini akan diteruskan dengan pelaksanaan program solar leasing di 37 sekolah-sekolah dan 5 PBT terpilih dengan jangkaan kapasiti 2.5MW diseluruh negara. Pelaksanaan inisiatif ini akan membolehkan sekolah-sekolah serta PBT-PBT menikmati penjimatan bil elektrik tanpa perlu mengeluarkan sebarang bayaran modal serta bayaran penyelenggaraan untuk tempoh 21-25 tahun.

Untuk makluman Ahli Yang Berhormat,

Di samping penjimatan melalui pemasangan solar, bangunan-bangunan juga mampu menikmati penjimatan melalui langkah-langkah menambah kecekapan tenaga, dengan izin, *energy efficiency*. Dalam Belanjawan 2020 telah diumumkan bahawa kerajaan akan mengimplimentasi program Energy Performance Contracting (EPC) untuk sektor kerajaan.

Melalui EPC, syarikat swasta boleh menjalankan projek retrofit di bangunan-bangunan kerajaan untuk menaik taraf kecekapan penggunaan tenaga di bangunan-bangunan kerajaan, dan penjimatan kos tenaga akan dikongsi bersama di antara kerajaan dan syarikat perkhidmatan tenaga (ataupun kita panggil *energy service companies*, ESCO). Dengan ini, CAPEX syarikat swasta boleh dibayar balik, menjadikan projek-projek EPC *bankable* dan boleh mendapat *private financing* daripada bank swasta.

Pada masa kini, terdapat 5 projek EPC untuk bangunan kerajaan iaitu bangunan SUK Negeri Sembilan, SUK Kedah, SUK Perlis, INTAN dan MySA. Selain itu, MESTECC juga sedang berusaha bersama Kementerian Pendidikan untuk memulakan projek EPC di sekolah dan universiti. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 21 November 2019

SOALAN

DATIN PADUKA DR. TAN YEE KEW (WANGSA MAJU) minta **MENTERI DALAM NEGERI** menyatakan adakah terdapat perancangan untuk membina bangunan baru Ibu Pejabat Polis Daerah (IPD) Wangsa Maju di dalam kawasan Wangsa Maju memandangkan masa kini IPD Wangsa Maju terletak di Jalan Pudu di mana ia adalah luar dari kawasan Wangsa Maju dan telah menyusahkan orang ramai untuk membuat aduan atau sebarang urusan

JAWAPAN

Tuan Yang Di Pertua,

Cadangan projek Ibu Pejabat Polis Daerah (IPD) Wangsa Maju telah disenaraikan dalam pakej pembangunan *Batch* 3 di bawah Pembinaan BLT (PBLT) Sdn Bhd. dan dalam proses pertimbangan Kementerian Kewangan.

Projek ini sekiranya diluluskan, ia akan dilaksanakan di atas tapak Lot 710 Seksyen 88a Bandar Kuala Lumpur berkeluasan 5.656 ekar yang berdekatan dengan pusat bandar Wangsa Maju. Sebagai tambahan, terdapat juga projek pembinaan Balai Polis Setiawangsa yang terletak dalam kawasan Wangsa Maju di mana projek ini dijangka dapat beroperasi sepenuhnya pada bulan November 2019.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 21 NOVEMBER 2019 (KHAMIS)

SOALAN

Minta **MENTERI PERTANIAN DAN INDUSTRI ASAS TANI** menyatakan sejauh manakah tahap kebergantungan negara terhadap barangan mentah yang perlu diimport dari negara luar, apakah langkah Kementerian dalam memastikan penawaran bahan mentah keluaran tempatan mencukupi untuk menampung keperluan rakyat Malaysia, dan tindakan yang dijalankan oleh Kerajaan dalam menggalakkan rakyat Malaysia lebih minat untuk menceburi dalam bidang pertanian dan industri asas tani.

JAWAPAN

Tuan Yang Dipertua,

1. Perbandingan peratusan jumlah penghasilan makanan asasi berbanding dengan peratusan makanan yang diimport boleh diketahui menerusi formula Kadar Pergantungan Import (IDR). Ianya merupakan satu indikator yang menunjukkan sejauh mana pergantungan sesebuah negara terhadap import komoditi pertanian untuk memenuhi keperluan domestik. Nilai IDR yang lebih tinggi menunjukkan bahawa lebih banyak bekalan komoditi pertanian yang akan diimport bagi memenuhi permintaan domestik. Perbandingan kadar IDR berbanding dengan Tahap Sara Diri (SSL) adalah seperti berikut:

Komoditi agromakanan	IDR (%)	SSL (%)
Beras (IPB)	28.9	70.0
Sayur-sayuran	63.3	46.6
Buah-buahan	35.1	77.5
Daging Lembu/Kerbau	80.1	22.2

Daging Kambing/Biri-biri	88.8	10.2
Daging Babi (40% penduduk)	10.6	92.1
Daging Ayam/Itik	3.6	103.7
Telur Ayam/Itik (biji)	0.03	114.7
Tenusu (Liter)	147.1	3.5
Susu Segar (Liter)	43.4	58.3
Ikan Makanan	13.7	92.8

2. Antara usaha-usaha yang telah dan sedang dilaksanakan oleh Kementerian Pertanian dan Industri Asas Tani (MOA) bagi memastikan penawaran bahan mentah keluaran tempatan mencukupi untuk menampung keperluan rakyat Malaysia adalah seperti berikut:

- i. Melaksanakan pembangunan empat Kawasan Pembangunan Pertanian Bersepadu (IADA) iaitu Pekan dan Rompin di Pahang, Batang Lupar di Sarawak dan Kota Belud di Sabah sebagai jelapang padi negara yang baharu. Dengan pembukaan empat kawasan baharu ini beserta inisiatif-inisiatif lain seperti penggunaan varieti padi sah baharu yang berhasil tinggi dan rintang penyakit, hasil pengeluaran padi negara dijangka akan meningkat sehingga ke Tahap Sara Diri (SSL) sebanyak 75 peratus pada tahun 2020 dan seterusnya mengurangkan kebergantungan kepada import beras;
- ii. Meningkatkan pengeluaran dalam sektor perikanan menerusi pengukuhan pengurusan perikanan tangkapan, mentransformasi infrastruktur dan prasarana pendaratan ikan, menguatkuasakan Pemantauan, Kawalan dan Pengawasan (MCS) dan memperkasa industri akuakultur;
- iii. Meningkatkan pengeluaran sayur-sayuran menerusi pelbagai inisiatif penanaman seperti peluasan tanaman dalam Taman Kekal Pengeluaran Makanan (TKPM), penggunaan teknologi pertanian moden dan sebagainya;

- iv. Meningkatkan populasi ternakan ruminan melalui pelaksanaan Projek Ladang Satelit dan Taman Kekal Pengeluaran Ruminan. Kerajaan juga sedang melaksanakan sebanyak lima Lembah Tenusu dengan mensasarkan tambahan susu segar sebanyak 20 juta liter dalam tempoh lima tahun; dan
 - v. Melaksanakan pelbagai projek agromakanan yang mempunyai potensi pertumbuhan tinggi seperti akuakultur, rumpai laut dan sarang burung walit, mempergiatkan Program Agropreneur Muda dan membangunkan industri jagung bijian bagi menangani kebergantungan import bahan makanan untuk ternakan.
3. Beberapa program dan bantuan ditawarkan oleh MOA bagi menggalakkan rakyat Malaysia untuk menceburi bidang pertanian dan industri asas tani. Antara program dan bantuan yang disediakan seperti berikut:
- i. Program Geran Pemadanan (Pembiayaan Modal) iaitu program penyaluran bantuan peruntukan dalam bentuk Geran Pemadanan menerusi perkongsian pembiayaan antara Kerajaan dan usahawan;
 - ii. Program Pusat Pemprosesan, Pengumpulan dan Pemasaran (3P) iaitu penyediaan kemudahan premis dan peralatan yang lengkap bagi menggalakkan dan membangunkan usahawan-usahawan baru yang tidak mempunyai premis untuk membangunkan produk asas tani sekaligus menarik minat mereka untuk menceburi bidang pertanian; dan
 - iii. Program Pembangunan Latihan Usahawan iaitu pelaksanaan kursus atau latihan bagi memantapkan pengetahuan dan kemahiran keusahawanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 21 NOVEMBER 2019 (KHAMIS)

SOALAN NO. 32

Minta **MENTERI PERTANIAN DAN INDUSTRI ASAS TANI** menyatakan setakat manakah keberhasilan dan kejayaan projek ternakan akuakultur daerah Pitas di bawah projek “Sabah Corridor” yang telah menelan belanja ratusan juta ringgit. Sejauh manakah projek ini telah berjaya membuahkan hasil dari segi membuka peluang pekerjaan, kesan berganda ekonomi kepada industri perikanan negeri dan adakah projek ini "viable" dan memberi pulangan tinggi kepada pelaburan yang Kerajaan telah lakukan.

JAWAPAN

Yang di-Pertua,

1. Projek ternakan akuakultur di daerah Pitas merupakan salah satu projek *Entry Point Project 6 (EPP#6) National Key Economic Area (NKEA)* dan sekarang dikenali dengan nama Projek Pemacu Pertanian di bawah Kementerian Pertanian dan Industri Asas Tani. Projek ini yang berkonsepkan *Public Private Partnership (PPP)* yang melibatkan kerjasama antara Kerajaan Persekutuan, Kerajaan Negeri dan pihak swasta dan bukannya di bawah pembangunan “Sabah Corridor”.

2. Kerajaan telah melaburkan sebanyak RM182 juta bagi pembangunan infrastruktur asas manakala bagi pihak syarikat iaitu Sunlight Inno Seafood Sdn. Bhd. telah melaburkan hampir RM700 juta bagi pembangunan kolam ternakan dan lain-lain fasiliti. Sehingga kini sebanyak 1,784 hektar kawasan telah dibangunkan bagi tujuan penternakan udang dengan jumlah kolam yang telah dibina adalah sebanyak 1,145 unit.

3. Dari tahun 2016 sehingga Oktober 2019, syarikat ini telah berjaya mengeluarkan sebanyak 10,832.96 tan metrik udang marin dengan anggaran nilai jualan sebanyak RM270.82 juta. Pada tahun ini juga, syarikat telah memulakan eksport ke Korea dan Taiwan sebanyak 104.35 tan metrik dengan nilai eksport RM3.2 juta.

4. Projek ini juga telah berjaya menghasilkan '*spillover effect*' seperti berikut:

- Mewujudkan peluang pekerjaan kepada 780 orang di mana 97% adalah pekerja tempatan dan berasal daripada Sabah. Sasaran projek ini adalah untuk membuka lebih banyak peluang pekerjaan kepada 3,000 orang setelah projek beroperasi sepenuhnya; dan
- pembangunan kemudahan infrastruktur iaitu jalan raya, air dan elektrik kepada penduduk setempat.

5. Berdasarkan perancangan dan *Key Performance Index* (KPI) yang ditetapkan oleh Kerajaan, Syarikat dijangka akan menghasilkan sebanyak 20,000 tan metrik udang marin dengan anggaran nilai RM500 juta setelah projek beroperasi sepenuhnya.

6. Projek ternakan akuakultur ini adalah "*viable*" kerana merupakan salah satu penyumbang utama kepada pengeluaran udang di Negeri Sabah dan di peringkat nasional. Dalam jangka masa yang panjang dan berterusan, projek ini dijangka akan dapat memberi pulangan tinggi kepada pelaburan yang telah dibuat oleh syarikat dan Kerajaan. Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 21 NOVEMBER 2019 (KHAMIS)

SOALAN

Datuk Hajah Azizah binti Datuk Seri Panglima Haji Mohd Dun [Beaufort] minta **MENTERI PERTANIAN DAN INDUSTRI ASAS TANI** menyatakan pelan perancangan Kementerian dalam menarik minat lebih ramai lagi golongan muda menceburi bidang usahawan pertanian terutamanya kawasan luar bandar bagi mengukuhkan lagi sektor pertanian di negara kita.

JAWAPAN

Tuan Yang di-Pertua,

1. Kementerian Pertanian dan Industri Asas Tani (MOA) telah mengenalpasti lapan (8) idea utama di dalam Dasar Agromakanan Negara (DAN) bagi membangunkan sektor agromakanan. Salah satu idea utama tersebut adalah pembangunan modal insan pertanian bestari dan berinformasi. Pembangunan modal insan yang berpengetahuan, berkemahiran serta produktiviti berintensifkan teknologi dan inovasi akan diberikan tumpuan supaya dapat menyokong serta menggalakkan penglibatan golongan muda di dalam sektor agromakanan terutamanya kawasan luar bandar.

2. Bagi menarik minat lebih ramai lagi golongan muda menceburi bidang usahawan pertanian terutamanya kawasan luar bandar, MOA mengambil langkah proaktif melancarkan Hala Tuju Kementerian Pertanian dan Industri Asas Tani: Prioriti dan Strategi 2019 – 2020. Dokumen Hala Tuju ini mengandungi lima (5) Hala Tuju yang dibangunkan bersama 18 strategi dan 51 inisiatif untuk dilaksanakan dalam tempoh 2019 hingga 2020.

3. Pembangunan agropreneur muda telah diberikan keutamaan di dalam Hala Tuju ke 3 iaitu Menjadikan Pertanian sebagai Satu Sumber Pendapatan yang Mampan dan Kukuh serta Menguntungkan untuk Petani, Penternak, Nelayan dan Agropreneur Muda. Melalui Strategi 3 Pembangunan Agropreneur Muda dalam Bidang Agromakanan telah ditetapkan inisiatif iaitu Program Agropreneur Muda (PAM) yang dilancarkan bagi tujuan menarik minat agropreneur muda yang berumur di antara 18 hingga 40 tahun untuk menceburi sektor agromakanan. PAM menawarkan bantuan geran dan pembiayaan kepada golongan muda. Bantuan khidmat nasihat teknikal, rundingan serta latihan bagi membangunkan projek-projek pertanian yang akan dilaksanakan turut disediakan sekiranya ada keperluan. Dari tahun 2016 sehingga Oktober 2019, seramai 5,449 agropreneur muda seluruh negara telah mendapat manfaat daripada PAM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 21 NOVEMBER 2019 (KHAMIS)

SOALAN

Minta **MENTERI PERTANIAN DAN INDUSTRI ASAS TANI** menyatakan alasan mengapa mengimport daging tidak ada persaingan sihat dengan hanya rumah penyembelihan tertentu daripada 7 negara sahaja dibenarkan, dari India 3 daripada 7 rumah penyembelihan adalah dimiliki oleh satu syarikat manakala dari Brazil 5 daripada 8 dimiliki oleh satu syarikat dan langkah-langkah untuk menangani keadaan ini.

JAWAPAN

Yang di-Pertua,

1. Proses pemilihan loji penyembelihan luar negara dilaksanakan secara telus dan melalui pelbagai prosedur sebelum kelulusan diberikan. Proses kelulusan mengambil masa di antara enam (6) bulan hingga 24 bulan. Kelulusan hanya akan diberikan setelah melalui proses-proses seperti berikut: -

- i. pelaksanaan penilaian risiko berkaitan ancaman penyakit dari negara pengeksport;

- ii. penyediaan protokol pengimportan dengan persetujuan negara yang akan mengeksport untuk mematuhi keperluan serta syarat-syarat yang ditetapkan oleh Malaysia;
 - iii. penghantaran dokumen berkenaan dengan loji yang telah dicadangkan oleh negara pengeksport;
 - iv. pelaksanaan audit kepatuhan dokumen ke atas loji yang telah dicadangkan; dan
 - v. pelaksanaan audit ke atas loji yang dicadangkan oleh negara pengeksport. Bagi melihat kepada keperluan halal, audit akan dijalankan dengan kerjasama Jabatan Kemajuan Islam Malaysia (JAKIM). Manakala, bagi loji-loji di India pengauditan akan turut dilaksanakan dengan kerjasama Kementerian Kesihatan Malaysia.
2. Adalah benar bahawa setakat ini, di India terdapat tujuh (7) loji yang telah diluluskan dan sebanyak tiga (3) loji adalah dimiliki oleh syarikat yang sama. Manakala, di Brazil terdapat lapan (8) loji yang telah diluluskan dan sebanyak lima (5) loji adalah dimiliki oleh syarikat yang sama.
3. Loji-loji yang telah diluluskan tersebut adalah loji yang telah memenuhi keperluan standard yang telah ditetapkan. Manakala, loji yang tidak menepati standard tidak akan diluluskan dan ini telah menimbulkan persepsi bahawa hanya syarikat-syarikat yang tertentu sahaja yang diluluskan.
4. Secara keseluruhan, sebanyak 51 loji pemprosesan luar negara telah diluluskan, iaitu dari tujuh (7) negara pengeksport bagi membekalkan daging dan produk daging yang telah memenuhi standard sepertimana yang ditetapkan.
5. Pengimportan adalah terbuka kepada syarikat yang berkeelayakan dan pengimportan hanya dibenarkan dari loji-loji yang telah diluluskan oleh Kementerian melalui Jabatan Perkhidmatan

Veterinar dan melepasi keperluan Halal, *Hazard Analysis and Critical Control Points* (HACCP) dan *Good Manufacturing Practices* (GMP) akan diberi kelulusan dan dipamerkan di dalam laman sesawang DVS.

6. Bagi menggalakkan persaingan yang sihat dalam kalangan pengimport dan seterusnya memenuhi jumlah keperluan daging rakyat Malaysia, Kementerian sedang dalam proses mempertimbangkan permohonan mengimportan produk daging dari negara-negara lain dari negara Argentina, Uruguay, South Afrika, Zimbabwe, Serbia, dan Mongolia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan apakah perancangan jangka pendek dan jangka panjang yang konkrit untuk memperbaiki dan menaik taraf sekolah-sekolah daif dan usang di Sabah terutama di Kalabakan dan adakah usaha untuk menjadikan Kalabakan sebagai hub pendidikan bagi meliputi kawasan pedalaman Sabah yang luas tapi kurang diperhatikan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha memastikan semua rakyat Malaysia menikmati runag yang kondusif untuk pembelajaran. KPM juga konsisten dalam memastikan proses pembelajaran murid-murid bersifat inklusif kepada semua, terutamanya untuk anak-anak di Sabah dan Sarawak. Pelaksanaan program pembangunan semula sekolah daif akan terus menjadi keutamaan memandangkan keperluan menyediakan infrastruktur standard, selamat dan selesa adalah masih tinggi di Sabah dan Sarawak. Walau bagaimanapun pelaksanaannya dibuat secara berperingkat berdasarkan tahap kritikal dan tertakluk kepada kemampuan kewangan negara.

Sehingga kini, pelaksanaan naik taraf dan pembangunan semula sekolah daif di negeri Sabah melibatkan 153 buah sekolah dengan kos projek berjumlah RM552.152 juta melalui peruntukan pembangunan dan Private Finance Initiative. Untuk pelaksanaan projek daif tahun 2018, sebanyak 120 buah sekolah daif telah dinaik taraf dengan kos sebanyak RM429.741 juta.

Di kawasan Parlimen Kalabakan khususnya, pelaksanaan naik taraf dan pembangunan semula sekolah daif melibatkan 1 buah sekolah daif iaitu Sekolah Kebangsaan Sungai Haji Matahir dengan kos projek berjumlah RM10.2 juta melalui peruntukan pembangunan dan Private Finance Initiative.

Bagi pelaksanaan tahun 2019, peruntukan sebanyak RM10 juta telah diluluskan melibatkan naik taraf dan pembangunan semula 3 buah sekolah daif di Sabah. Kesemua projek ini akan dilaksanakan oleh pihak Jabatan Kerja Raya secara tender terbuka. Projek-projek ini dalam peringkat penilaian dokumen tender. Surat Setuju Terima akan dikeluarkan sebaik sahaja penilaian tender dimuktamadkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB PUAN NOORITA BT. SUAL (TENOM)

TARIKH : 21 NOVEMBER 2019

SOALAN

PUAN NOORITA BINTI SUAL [TENOM] minta **MENTERI DALAM NEGERI** menyatakan :-

(a) langkah jaminan Kerajaan dalam memperkenalkan Pas Sementara Sabah (PSS) terutama mengawal selia lebih 660,000 warga asing yang sudah mempunyai Kad BurungBurung, Sijil Banci dan IMM13; dan

(b) apakah mekanisme yang boleh mengekang kemasukan warga asing yang baharu datang ke negeri Sabah atas tujuan pekerjaan memandangkan isu warga asing ini adalah isu utama dan serius di negeri ini.

JAWAPAN

Tuan Yang Di Pertua,

Pelaksanaan Pas Sementara Sabah (PSS) adalah bertujuan untuk menyeragamkan kepelbagaian dokumen yang dimiliki oleh warga asing atau *displaced person* di Sabah iaitu pemegang dokumen IMM13 yang dikeluarkan oleh Jabatan Imigresen Malaysia, Kad Burung-Burung yang dikeluarkan oleh Jabatan Ketua Menteri Sabah dan Sijil Banci yang dikeluarkan oleh Pasukan Petugas Khas Persekutuan Sabah, Majlis Keselamatan Negara Sabah.

Keseragaman dokumen ini dilakukan bagi memudahkan pengecaman dan operasi oleh pihak penguatkuasa. PSS hanya akan dikeluarkan kepada pemegang dokumen sedia ada yang telah disahkan oleh agensi pengeluar yang berkaitan. Selain itu, semakan silang data antara agensi juga dilaksanakan bagi memastikan pemegangnya adalah tulen sebelum PSS dikeluarkan.

Untuk makluman Ahli Yang Berhormat, PSS yang akan dikeluarkan adalah dalam bentuk kad yang mempunyai ciri-ciri keselamatan seperti biometrik dan mempunyai nombor ID yang unik yang membezakan PSS dengan pas-pas imigresen sedia ada. PSS juga adalah sebagai mekanisme kawalan keberadaan dan pergerakan warga asing di Sabah.

Pemegang PSS masih dikategorikan sebagai warga asing dan pemegang pas ini tidak layak dipertimbangkan pemberian Permit Masuk, taraf Pemastautin Tetap dan kewarganegaraan. PSS akan terbatal sekiranya pemegangnya disabitkan dengan kesalahan jenayah atau telah mendapat pasport daripada negara asal. Tindakan pengusiran akan dilaksanakan oleh JIM bagi warga asing yang telah mendapat pasport daripada negara asal mengikut prosedur sedia ada. Sebelum sebarang dokumen perjalanan daripada negara asal dikeluarkan, warga asing ini perlu memegang PSS bagi tujuan rekod keberadaan dan pergerakan.

PSS juga hanya dikeluarkan kepada warga asing sedia ada di Sabah yang layak dan sedang memegang IMM13, Kad Burung-Burung dan Sijil Banci. Bagi kemasukan baharu ke negeri Sabah bagi tujuan pekerjaan, perkara ini adalah tertakluk kepada dasar semasa pengambilan pekerja asing di peringkat Kerajaan Negeri Sabah.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SRI MUSTAPA BIN MOHAMED [JELI]

TARIKH : 21 NOVEMBER 2019 (KHAMIS)

SOALAN

Minta **MENTERI PENDIDIKAN** menyatakan bilangan graduan dalam bidang TVET dalam tahun 2018 dan 2019 mengikut bidang dan peratus kejayaan mendapat pekerjaan mengikut sektor dan gaji purata graduan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan Sistem Kajian Pengesanan Graduan (SKPG), terdapat 21 bidang sektor ekonomi yang telah dikelaskan mengikut pekerjaan graduan TVET. Bilangan graduan TVET di politeknik dan kolej komuniti adalah masing-masing 32,274 dan 11,150 orang pada tahun 2018. Namun begitu, hanya 67 peratus graduan politeknik dan 70 peratus graduan kolej komuniti yang memberi respon SKPG.

Daripada laporan statistik SKPG, dapat dirumuskan bahawa seramai 13,136 (61 peratus) graduan daripada politeknik ditawarkan gaji permulaan antara RM1,001.00 hingga RM2,000.00 dalam pelbagai sektor ekonomi tersebut. Manakala, graduan kolej komuniti pula seramai 6,291 (81 peratus) telah ditawarkan gaji permulaan RM1,500.00 dan ke bawah.

Manakala bagi program Diploma Vokasional Malaysia (DVM) yang dilaksanakan di kolej vokasional, Kementerian Pendidikan Malaysia (KPM) telah berjaya melahirkan graduan pertamanya bermula tahun 2016. Sehingga kini, lepasan kolej vokasional mendapat sambutan yang baik oleh industri. Berdasarkan tinjauan yang dilakukan oleh KPM kebolehpasaran graduan kolej vokasional tahun 2016 adalah 100 peratus. Manakala bagi tahun 2017 pula 96.70 peratus dan tahun 2018 adalah 87.05 peratus dan gaji permulaan yang ditawarkan antara RM1800 hingga RM2000.

Sekian, terima kasih.